

何維剛

何維剛，一九八六年生，目前為國立臺灣大學中國文學系博士研究生。學詩於網路古典詩詞雅集，為興觀詩社、重興詩社社員。

優等獎 | 臺北懷情八首

昔子安流寓，常念山陽，子桓附位，久思鄴下。節同時異，契闊殊途，知懷人慟切，然亦不可不思。何則，所悲者舊情、所懷者故我也。際遇隨人，浮沉與世，嗔癡愛恨，宛若無痕，始知我輩鍾情，終亦因情所累。離別三年，猶如昨日，悲歡聚散，盡在臺北。作懷情八首，以記衷情。

一、憶登碧潭和美山步道

碧潭春雨淡煙波，數載睽違情若何。老樹縱橫垂露重，群山跌宕送青多。回眸愛恨同溫散，處世因緣付玉磨。時節有花須痛醉，莫淪思念久蹉跎。

二、憶夜遊淡水

連波燈火慰淹留，良夜無緣續舊遊。萬頃咸歸舳舻驚，一竿橫釣海潮秋。風迷淚目妨回首，情動襟懷礙倚樓。常願人間時靜好，天涯共對月華柔。

三、憶子夜訪敦南誠品

流年在再淚難禁，重訪書城尚動心。情竇曾將詩探伺，悲歡徒向夢追尋。恒於紙上賡篇詠，卻恐人前問信音。一縷茶香隨不寐，憑窗獨品夜深沉。

四、憶雨中九份品茗

一回遙望一銷魂，雲影蒼茫薄海門。幾度登階傷舊夢，曾經執手對清樽。萃縈情思頻重繞，冷淡茶炊難再溫。欲倩山城蕭瑟雨，憑天為我泣黃昏。

五、憶雨後遊大湖公園

霽草池塘鎖嫩光，浮生過眼怯思量。碧山經雨多春意，曲岸無人自夕陽。天色與心千況味，世情如水一清涼。興闌未忍輕歸去，儷影當時隔渺茫。

六、憶竹子湖賞海芋

回首韶華易別離，可憐光景隙駒馳。瑤芳遞韻參差葉，山色分姿嫋娜詩。也道緣慳堪覆水，未聞花謝再攀枝。數年春信知依舊，只是同儔莫有期。

七、憶光華商場觀夕

入世清淳任剪裁，青春只合夢中回。難移血氣營鴻志，偶縱疏狂溺死灰。淚涸終知緣分到，情真始見歲華催。詩懷早不堪殘酒，誰共天涼一舉杯。

八、臺大圖書館觀夕

盛年難過最情關，幾欲登高一解顏。歲月終分歧路遠，風塵漸染鬢毛班。為卿飄泊欣歸宿，徒我凋零羈世寰。夕照麗天催落寞，鵬城遙望指南山。

案：鵬城句，卿我各在臺大政大。

評審意見／顏崑陽

八首皆以臺北地理情境結合自己的男女情愛經驗做為主題，八處地點依情愛經驗之始終過程為序，做追憶性的書寫；故八首悉以「憶……」的格式製題，合成組詩的形構。各篇辭情清麗，卻能自出機杼，而無熟爛之語。敘事、抒情、寫景融合無間；尤以景句不但意象鮮明如在目前，更且能涵情於景，故象外別蘊虛神。其妙句時出，讓人心眼一新，為之低回者三。而雖情傷在抱，猶能自我節制；故含蓄委婉，淡遠處之，不致流於濫情俗意，確是格高之作。